

„„Jedyn dostatk mamoj““, rjekny  
Lapka k njej ta rubjana,  
„„Kajkiž pak mi přichod čekny,  
Znjesu jara spokojna,  
Žanu krasnosć na swěci  
Papjernik mi njerubi.

\* \* \*

Z plačom husto knježa w swěci  
Smjertnu dróhu nastupja,  
Bjerje smjereć pak w khudej hěci  
Wbohoh' rubjenc-nošerja:  
Tón so lohcy spokoji,  
Dokelž mało přisadzi.

(21. | 2. 1850.)

— \* —

## 62. Kapon a wroble.

(Časopis M. S. 1860, 4.)

Řřed bróznju něhdy wo klósku  
So wroble sylnje wadžachu,  
A jedyn přemo druheho  
Sej skoba drastne pjeričko,  
A z njepopřećom hawtuje:  
„Ty złodzijo! Ty paduše!“

Duž husy, kački nazdala  
Tam wćipne hlówy zběhaja:  
„„Njej' to naš dwór a hajnišćo,  
Što chcedža tući prošerjo?““  
A kapon, hejtman kurjacy,  
Tam ćeri hladać horliwy.